

2 Timuteyu

Timuteyutshi mozhua ne kalta zuñgajienapanaldiamak

Meja ai kalta gauwane: Pábulduki Duwe Jesúja ají múldigaba guaxal gaxaneja jalde kaltaki gauwane. Aldéñki naki shuixal noxaldixa aldiwe kalseldi izhoguéñ jalde kalta Timuteyu agakauwane. Akldé Pábuldu shaldaga miñkualdaldiamake “Aldumaxa zaldakuetshi kalta zuñgajienapanaldiamak” gaune tuakue.

¿Metshi kalta gauwane? Pábulduja asukuá jana ne Timuteyu jalde kalta agakauwane. Akldé Timuteyu shaldaga miñkualdaldiamake “Timuteyutshi kasak ne kalta zuñgajienapanaldiamak” gaune tuakue.

Jinak ai kalta gauwane: Atshak Pábulduja naki shuixal noxaldixa akué nane (1.16-17; 2.9; 4.13). Akna Timuteyu sakí muldetua Duwetshi jiba ulditshixalga nogakue aldiwe guiyaba akbeji kalta agakauwane. Ekibeñga na, Timuteyu namak shitiyanamakga abá naldakí namak jañgui, shaxaldiyakue akbeyaldiamak. Ekíga na, Pábulduja sakí Duwe axazauwi izhogamakbe agastuwi amak izhogakue akbeyaldiamak. Atshak Pábuldu matshuwi jibañ tuwi, itshaniñgaba guatoguéñ, Duwe ipananeke sakí alduká akualdana akzeshi na, jalde kalta Timuteyuk agakauwane.

Ji, ji shalda guashi jalde kalta gaune:

1. Kasak misha ji shalda akbene (1.1-2)
2. Muldetua Duwe Jesúk agapa neyakue (1.3-14)
3. Pábulduja sakí nuka akbene (1.15-18)
4. Duwe Jesú axazauwakuamak axazauwakue akbene (2.1-26)
5. Auxa zegapanatshak sha ashekualdapanaldixa (3.1-9)
6. Timuteyu guiyaba akbene (3.10-4.8)
7. Sakí atshakue aldiwe akbene (4.9-18)
8. Aldiwe akbene (4.19-22)

Pábulduja Timuteyuk mozhua ne kalta akuzgaune

1 ¹Naski Pábuldu Saldiña netshi Jateja jañguamak Asukuá Duwe Jesú Z̄nekualkajañki ají múldigaba guaxal nakaxanek kalta gauwatokuge. Jateki Asukuá Duwe ipanañkaldekuañ izhoshiña z̄nezhokshaldixa z̄ñmeyanane nak, ai shalda guaxaldikuamak nezhgakuxane nzhakú. ²Timuteyu, mañki nasukuá giemi^a jana majañguge jalde kalta mikuzgauwatokuge.

Saldiña netshi Jate Nauwijatega, Asukuá nauwijí Sáñkalda Duwe Jesú na, atemajañ éegaba guañ majañgui na, zeñ majañgualga, muldetua aldunaxa señgaba mikzukui shi mezhokshí.

Muldetua Duwek agapa neyakue

³Guatshak nabamakueja Jate axazauñka nanamakbeña, nas jiaga “atshakuamak sha atshatokú” nakldeshi axazauñkuge. Niuwisuñ, sesuñ axazguakugauxa ma shalda be mezhgisekui, “zeñ nzhakldék” akbeñkuge. ⁴Nas mabashapanaldatshak mauwamalde be nagisegatshakna, matshuwi zeñ nakzexaldiamak mokue matundana nakzeshi ni izhokú. ⁵Ma Duwe Jesúk migatsauxa alduna mishixa jiaga be mezhgisekualga nokuge. Akze, mijaba wezhu Aldueda, mijaba Eyunise mizhaxaña Duwe Jesú namak ajañgui, alduna iyashixa nanamak, ma jiaga ekíga Duwe namak jañgui, agapa neyabalduka muldetua maldakué.^b ⁶Ekí nakuakna ekí be migisekualdikue. Káuxalda mipañgualdatshak Jateja axautshikue magaunexaldiamak matshishaldixa migenekí guksé sanazhaldiamak ajueñguamak akldéña amak axatshál maldoxaldí. ⁷Akze, Jateja zhe zalda xalde naldakualdiamak ají Alduna z̄ñgegazháne. Ekí ne, aldunaxa kama naldakualdiamak z̄nake ají Alduna z̄ñgene. Eñkaña na, axautshikue izhgajañguakualdiamak z̄ñgauneka. Eñkaña na, axaldáñ muldetua zhiksanegakualdiamak z̄ñgauneka nakldá.

⁸Akna nauwijí Sáñkalda Duwe mikuane shalda guagakue jiwak mikzegagába, ni nas e shalda kalseldi nabexane shalda jiaga jiwak mikzegazháldi. Ekí ne, Jatejañki ají kama migenéñ zhinik na, Duwe shalda guaxabaldogéñ najanamé e shaldaki guiyaba tumildaka mitshanaldí. ⁹Akze, Nauwijatega z̄nekualdi ají giemikue, aldéñ akldunamak izhogakualdiamak z̄nezhgakuxá guane. Naldatshak nasuñ janshizhe katshéñ zhinik z̄nezhgakugagába,^c kasaxaga

^a 1.2 1Tm 1.2 ^b 1.5 Ajsh 16.1 ^c 1.9 Ep 2.8-9; Tit 3.5

zhinik éegaba guaň zúnajañgui Asukuá Duwe Jesúk zúnekualdaldixa janazúñgaktunanéñ zhinik na ekí zúnezhgakuxane. ¹⁰Ne kaigaki Asukuá Duwe Jesú zúnekualdal kagik nagatshakna, Jate mitsá éegaba guaň zúnajañguxa mu zúñgisekuá. Akze, Duwejañki shuixak kama ikugatshakna agubiyá guane.^d Akna Duwe zúnekuane nukshi kipanéñ zhinik na, izhoshiñga zúnezhokshataná mu zúñgisekuá guane nakldá.

¹¹Akze, Duwe Jesúja aldéñ zúnekuane shalda guaxaldikuamak, ají múldigaba guaxal nakaxane naldaldikuamak, e shalda shizhiyaldikuamak nezhgakuxane.^e

¹²Amak axatshikuge shalda na kalseldi, guiyaba tuwi izhoxaldatshak jiaga, jiwak nakzegáaki ni izhokúf Jinak naldakí. Naski Duwe Jesú namak jañgui alduna ishikugeki muldetua “me ne” nakué. Ekí nakualdi na, “Duweki kaiga zhinik mokue naxaldieñka yo, nají alduna auxaga agenuge numañ nagatuaka, jiba axatshaldikue nagene numañ nagatuñka shakldá” nakué nak.

¹³Guatshak nas jian shi mixaldiyanuge nagastú xaldeki ma zhinik ekíga shizhiji makualdí. Amak shizhiyabaldogatshak, Duwe Jesútshi nekbaldéñ zhinik na, ek za alduna ishalga, axautshikue kezhgajañgualga mizhoxaldí.

¹⁴Jateja múldigaba Asukuá zúnekuane namaklde makuaxaldiamak mezhgakuxane nakna, ají Alduna nasúñldi izhuka migaunegatshakna, ai jian shizhiya akzeki ayushazháldiamak numañ tuwi makualdí.

¹⁵Guatshak mikuamakga na, Asia zalda Duwe ipanane matshuwi nekueki nabashá akuane, aikuega na Pijeldu, Edmójene nakldá.

¹⁶Onésipulduki ajúk zaldakue juizhi nauwijí Sáñkaldaja guaň jañguakue akshishikuge. Jinak naldakí. Kalseldi nabexane shalda jiwak akzegagába, naxabizhi matshuwi juizha zeñ nakzukui aldunaxa nezhiksekushane. ¹⁷Ekí atshaldiamake, jai kuíbuldu Aldumak nagatshak, mani nabexane akzaldaldikuamak kama ilshiji naldijiñgaba akzanuge. ¹⁸Axañga Epesuxa izhogukuéñ jiaga, eñki nagauneshiñgaba izhonane muldetua mikué. Akna, nauwijí Sáñkalda Duwe Jesú zúñgatsé azhi zúñgatsaldakí ne zúnatualdiéñ ldiuwañ, eñki guaň shi jañguí.

Duwe axazauwakuumak axazauwakue

2 ¹Nasukuá ma, Duwe Jesú éegaba guaň majañguéñ zhinik na aldunaxa kama guxamalde mizhoxaldí. ²Guatshak matshuwi nekueja nukatoguéñ Duwe shalda shizhiyaté naldukamaldamakga, ma zhinik mieldekueki axautshikue amak shaxaldiyaka alduna ishamildakakuek na shaxaldiji makualdí.

³Guatshak suldáu janshizhe^g guiyaba tuakue agatsegatshak abetamakbeñga, mañki Duwe Jesú axazauwabaldoxaldieñ guiyaba tuakue

^d 1.10 1Kt 15.54-57 ^e 1.11 1Tm 2.7 ^f 1.12 Alm 1.16-17 ^g 2.3 2Tm 1.8,12; 3.12.

Nasúñ Duwe ipanañkaldekuañki Duwe Jesútshi suldáu jana kaldé. Akna, ek iyabá naldakí neyañkaldogéñ guiyaba katuatshak jiaga, agapa neji, ek za axazauwi izhoxañkaldogéñ aldéñ aguldiñka jisé ají aldunakue na kaxaukshixa.

mitgatsexaldiák, nauwijanamá abeti makualdí. ⁴Akze, suldáu ají sáñkaldak aklidunamak axatshindana akzegatshakna, eja jiba agene axatshál izhoxaldiéñ, ni mitsák ají jiba naldagálde atshaka jañguazhé nak ekibé naldakue. ⁵Ekibeñga na, ezua naldi jokldeka jana naldakue. Nalkakue mielde axañga neyaldiéñka neyaldiake, ubixa awatualdiamak sáñkaldak izhalshuxa agaxeka. Ne, sakí naldakue auxabé naldakí naldaldiák, ai ipanazhaldixa nakldá. ⁶Ekíga na, tezhi jiba atshixa jana naldakue. ⁱMieldeki muldetua gakue munaldiamak kama ilshiji jibatshandixa gakue axaldegatshak, aldéñ misha izhgakugakuamak izhgakuka naldashá. ⁷Sakí mikbeyatokuge muldetua agajañgui makualdí. Ekí magajañgualdiake nauwijí Sáñkaldajañga muldetua migajieñgualdixa nzha.

⁸Duwe Jesús shalda ekí be mizhgisekualdí: Aldéñki nauwibama Dabítshi atukua nane. Ega na nauwitsaldí shuiguenu Jateja mokue izhgaldakshá guane. Akna Duwe z̃nekuane shalda guaxaldatshak ekí za guaxal izhokuge. ⁹Ekí guakugé shalda na, sha atshixa jana guiyaba tuwi kalseldí shezhasha nezhuka ni izhokú. Ekí neji guanakldegak izhoxaldatshak jiaga, Jatetshi múldigaba z̃nake ni jiyája itamakua naldakí, neyalga nzhok. ¹⁰Akna Jateja káguba ikualdaldixa kezhgakuxanekueki agaunexaldikuamak sakígaba jibañ tuakue nagatsaldaldiák jiaga abeti, “wa” nuxa itshanaldikue. Ekíki Duwe z̃nekuane namak jañgui iyapani zhinik na amak keyakuanekue, Jateja aldéñ na muñshí zeñka izhoshiñga kezhokshaldiamak.

¹¹Jalde múldigabaki alduna ishaminaka:

Duwe Jesús shuigatshaga, nasuñ jiaga e nañga shuañkalde zhuxañga kaldake, ^jake, e nañga be izhogakualdixa.

¹²Nasuñ Duwe shaldá guiyaba tuwi abetakualdíák, ake, aldéñ na saneshi izhogakualdixa nzha. ^k

Ekí ne, “Duwe Jesús ipanazhánuge nzha” guagakualdíák, ake, aldéñ zhinik “nají naldagáldekue nzha” z̃nakuaxaldixa nakldá. ^l

¹³Nasuñ Duweja z̃ñmeyamak axatshál nogakí naldakualdíák jiaga, aldéñki sakí z̃ñkatshaldixa z̃ñmeyanamak z̃ñkatshixaga nakldá. ^m

Jinake naldakí. Aldéñki me ne ayushá atshazháka nak.

^h 2.5 1Tm 4.7-8; 1Kt 9.24-27 ⁱ 2.3-6 Suldáu azhi ezua naldi jokldeka azhi tezhi jiba atshixa jana naldakue z̃ñmeyatshake ekí guashi naldaka. Nasuñ Duweja janshizhe z̃ñkatshaldixa z̃ñmene ipanakualdiamake, aldéñ sakí axazauwakue, izhogakue nake, auxabé kama ilshijiñga axatshakue z̃ñgatsé. ^j 2.11 Alm 6.6-8; Ga 2.20. Ekí z̃ñmeyatshake ekí guashi naldaka. Shuane sha atshindana akzekaja aksanegaksánamakbe, z̃ñsanegazháka itshanakue z̃ñgatsé. ^k 2.12 Alm 8.17
^l 2.12 Mt 10.32-33; Lk 12.9 ^m 2.13 Alm 3.3-4; 1Kt 1.9

Jatek akldunamak za axazauwakue

¹⁴Guatshak ekí mikbeyatokugeki Duwe ipananekek be kagisekualga noshi na, Jateja tuatogén ishkaldukaldiamak ekí kabakbeyaldí: “Múldigababata zhiksashiji izhogasúñze.”ⁿ Mieldeki ekí izhoxaldiake, ni mek axazauwazháldi na, aldukatukakue aldunaxa kagisalshi za atshaldixa nzha.

¹⁵Ne ma zunake Jateja ají jiba janshibé axatshamalde matualdiamak kama ilshiji makualdí. Ekíki ají múldigaba namaklde shizhiyakuauxabe shizhiji mizhoxaldiák, ni ji shalda jiwak mikzegakue migatsaldazháldiamak. ¹⁶Ekí ne, ezuakueki múldigaba agatsegazháka Jatek zhinik nagazháne za duldashál ashekualdatshakna, akldé akldenğa Jatek akldunazhámak ashekualdapanaldixa nakna, ma zunake ekí duldashagábaki, aik agajué maldoxaldí. ¹⁷Akze, ekí agatsaldi duldashiji, naldagálde shizhaldiyatshakna, nuwa migaldagatshak saldińga abuá migaldagakuamak, aikueki Jatek axapa aldeyaksánatshak zhinik axautshikue jiaga iyajuldukhixa. Ekí shizhixakuega na Imeneyu na Pildetu na ¹⁸namaklde shizhiyak iyajuldunatshak zhinik, ekí naldagálde za shizhaldixa: “Jateki abisajań zunakukshatshakna au zunezhgaldakshá guane nak, abuáke zunezhgaldakshazháldixa nakldá.” Ekí shizhaldiyéń zhinik na, ezuakueki Duwek alduna iyashaksánsha akuane nakldá.

¹⁹Naldatshak, Jatetshi nekldekueki ají múldigaba namaklde ajańgualga za aldoshi, eńkáń kama akuxanéń zhinik na ekí kakzuńguane: “Saldińga netshi Sáńkaldaja ají nekldekueki akualdi nogatukakue.”^o Ekíga na, “ ‘Duwe Jesúki nají Sáńkaldak nakldá’ saldińga guakakuejańki sha ajanashixa nuk abajakue kagatsaldashá.”

²⁰Guatshak juwí atemaldińki jika matshuwi kue. Ezuakueki niuba akzekue axauwane nanaldixaki, ajáugukuija jiba akldé akzék za jiba akbeńka. Ne ezuakueki tiuwi azhi kaldi axauwane nanaldixaki, ajáugukuija jiba aguáń akzék nuxa jiba akbeńka naldashá. ²¹Ekibeńga na, mieldeki janshi ishkazguí sha atsha nuk majaldiakna, nauwijí Sáńkaldaja niuba axauwane jana jiba akldé akzé agegaka naldaldixa. Akze, eńki Jatetshi za naldaldixa, nauwijí Sáńkaldak muldetua axazauńka, saldińga janshizhe nalda axatshaldiamak janazhiktune naldaldixa nakldá.

²²Akna, mańki awawakue sha ajanashindana kakzegamakga atshabaldáldiamak sha atshindana mikzepak izhakuishi makualdí. Ekí izhakuishi na, migatsauxa ekí izhoxa maldiyaldí: Jian atshakuamak za izhoxa, Jatek za alduna isha, zújańgua izhoxa, axautshikue na muldetua seńgaba zhe noxa za maldiyaldí. Akze, saldińga aldunaxa janshi ishkazguane nauwijí Sáńkaldak akldé akzamakga akzukuxakue juizhi ekí izhoxa niyal maldoxaldí.

ⁿ 2.14 1Tm 6.3-4,20 ^o 2.19 Nm 16.5; Jń 10.14; 1Kt 8.3

²³Ne, ezuakueki alduna kaxaldegagálde jana, múldigababata akzaldagálde izhgasashapanaldinik asuxake axaukshaka mikuaakna kagaunegagába, múldigaba zhiksashak agajué za mizhoxaldí. ²⁴Akze, nauwiji Sánkaldak kaxazauñkakuañki múldigaba sashiji izhogasúñze zuñgatsé. Ekí naldagábaki, juañ zaldaba za axautshikuek kaxatshakue, Jatetshi múldigaba muldetua shizhiyanazúnaka naldakue, sakígaba zuñkajanashatshak, egaba abeti izhogakue zuñgatsé. ²⁵Akze, mielde aguldiji kizhukakue sam akzaldi Jatetshi múldigaba namaklde shi kaxaldiyakue. Jinake ekí atshakue naldakí. Saigabaki ekueja namaklde aldukatshak, Jateja kagauneshiñga sha atsha abashiji Jate axakualdi guaka nak. ²⁶Ekíki uba kakldeji guxá jana jiséja saigaba kejudukshaldiamak janaktunéñ kejudukshane iyaldakuixaldiamak. Akze, jiséja ají nashi kakuí, aldéñ kajañguamak axajanashaldiamak naldagálde nuxa jian kakzukuane nakldá.

Auxa zegapanatshak sha ashekualdaldixa

3 ¹Mikualdaldiamak ekí mikbeyaldikue: Auxa zegapanatshak, zuxaita jibañ tuakue ldiuwañ zexaldixa. ²Atshakna káguba axaldáñ za ajañguxakue, paldata za ijankakue, sekuazhikshixakue, axaldáñ shalda janshatgatsé za akuakakue, saldiñga aguáñ izhbashiji mual nekakue, kauwijatekue amak axatshazhékue, mielde kagaunegatshak “zeñ nzhakldék” negagáldekue, Jate axabetagáldekue, ³ni me izhgajañguagáldekue ashekualdaldixa. Ekíga na, sha kakuane ni nauwa axabetagáldekue, káguba nalda aguakakue, axaldáñ zhiksanegegáldekue, axautshikue sha gui mual za atshixakue, janshizhe atshakueki kaguldiñkakue naldaldixa. ⁴Ekí aldaldi na, kauwipbukue jiaga izhguak atshixakue, jañguagáñga za atshixakue, kauwizhéñ za akzé itshankakue. Ekíga na, Saldiñga netshi Jate izhgajañguagába, kauwizhéñ kakldunamak izhoxa za akzé ajañgualdixa. ⁵Ekí aldaldi na, Saldiñga netshi Jate akzé ajañguxakue ga abeldashi izhogatshak jiaga, jian izhogakualdiamak ají kama zuñgekaki ni nauwa ipanasúñ kakzekakue. Akna aikuek ni nauwa kaxabaldegagábaki, muldetua kagajué maldoxaldí.

⁶Akze, ekí izhukakueki munzhi aldunaxa kama aksúñzekue tshuxa kagakjuldunaldinik, kauwizhéñ za kaxazukaldiamak iyajuldukshi mual naldagálde jian kakzukuaxa. Guatshak ai munzhikueki saldiñga nalda sha ajanashindana kakzekája kaksanegamak matshuwi sha ajanashane shalda aldunaxa jie kakzekakue. ⁷Ekueki ji naldaldí shitiyal aldogatshak jiaga, mielde namaklde ne kakldegazhákakue. ⁸Akze, mauzeñga mozhua nekue, Jane, Jámbalde na, nauwibama Muesé kaguldiyanamakbe,^p ai naldagálde shizhixakue namaklde shizhiya kaguldiñkakue. Ekueki

nusagatse za jañgui, Jate shalda namak jañguazhékue ni alduna ishagáldekue nakna, Jate namak jañgua kakzegazhákakue. ⁹Naldatshak kauwizhéñ anuñkamé za ekí shizhiji, naldagálde nuxa namak ne kágubakue kajañgushaldixa. Jinake naldakí. Mitsá zegagá noxaldieña, kauwizhéñki alduna kaxaldegagálde jana nuxa shizhaldixakue saldiñgak mu akiyasexaldixa nak. Ekíga na Jane, Jámbalde na zekldane naldashá.

Timuteyuk guiyaba akbene

¹⁰Guatshak ma zúnake namaklde za shizhikuge muldetua mikualdi na, jian atshál izhokuge, Jatek za alduna ishiji izhokuge nagastuwi na, “Jatek za axazauwaldikuamak izhoxaldikue shakldá” za itshani izhokuge mikualkuge. Naski axautshikue izhgajañgui izhokuge, sakígaba naxajanashatshak abeti izhokugé, jibañ tualdatshak abá naldakí abeti izhokugé mikualkuge. ¹¹Ekíga na, sakí Duwe shalda sha nakuí guiyaba natuñshiñgaba nakuane jiaga mikué. Akze, kuíbuldu Antiukiáxa, Ikoniuxa, Aldístaldaxa mñngaki sha nakuatshak jiaga, abá naldakí, abetanuge. Guatshak mitsá juizha ekí sha nakuatoguén jiaga, aik zaxaitaldikuamak nauwíj Sáñkaldaki yo nakuí nagauneklde.⁹ ¹²Akze namak, saldiña Duwe Jesú ipananekue Jatek akldunamak izhokldana kakzekákueki sha kakualdixa. ¹³Ekí ne sha atshixakue na, jian shizhixakue ga ishkazguxakue na zúnake akldé akldéña sha ajanashiji alditshigapanaldixa. Ekueki naldagálde nuxa kágubakue jian agazukuatogatshak, jiak kauwizhéñ jiaga naldagálde nuxa jian kazazukuatoxaldixa nakldá.

¹⁴Ne ma zúnake namaklde shitiyamalde “namak shakldá” jañguamaldeki amak jañgualga maldoxaldí. Jinake naldakí. Mañki namaklde shi kizhixakuañ shi mixaldiyáñkalde mikué. ¹⁵Ekíga na, nóñgutse zhinik Jatetshi múldigaba sezhekldde mikwashekldde nak. Akze, ai múldigabaki Jateja Asukuá Duwe Jesú zúnekualdal gaxane namak jañgui, alduna mishatshak mikualka ne migajieñguaka. ¹⁶Guatshak Jatejaña ají múldigaba sezhekldauxaki, aldéña ai gauxakue kaksanegatshak za na amak ají múldigabaga kaltak kakaushanane. Akna, ai múldigaba sezhekldauxaki ekí zúñkazauñka: Jate shalda shi zúñkaldixa, shizhiyakualdiamak zúñkazauñka. Jatek akldunamak izhoxa shitiyakualdiamak, ijuldunatukakue izhgastuñshakualdiamak, jian izhogakue shaxaldiyakualdiamak zúñkazauñka nakldá. ¹⁷Ekíki ezuak ezuak Jatetshi nekalde, aldéñ kaxazauñkakuañki saldiña janshizhe nalda atshá guashi auxaga janazuñtune naldakualdiamak.

4 ¹Guatshak Duwe Jesú auxaga aksanexaldiamak mokue kagik nagatshak shua guanekue, be izhogatukakue juizhi agatsaldi azhi agatsaldakí

ne zúnatualdixa nakna aldéñ, Saldiñga netshi Jate na natuatogéñ, ekí atshakue niuwi migexaldikue: ²Jatetshi múldigaba guaxal za maldoxaldí. Mitsake kágubaja nukandana azhi nukasúñ kakzexaldíak jiaga, kakbeyal maldoxaldiamak janazhiktumalde maldoxaldí. Akna, ijuldunatukaki jian izhoxaldiamak aksanegakue. Sha atshatukaki izhgastuñshakue. Janshizhe izhoxa aldunaxa kakuiyakshakue. Ekí shi kabaxaldiyatshigak, axañga kagajienakí aldaldaldíak jiaga, egaba abeti, señgaba muldetua shi kaxaldiyalga maldoxaldí. ³Akze, kágubakue namaklde shizhaldixa aldukasúñ kakzexaldixa ldiuwañ zexaldixa. Atshake sha atshindana kakzekája za kaksanegamak ajanashiji na, kauwizhéñ nukandana kakzeka za kagabeyaldiamak shizhixakue matshuwi ishkajuizhakualdixa. ⁴Atshakna namaklde akldé nukasúñ kakzeshi, mauzeñga akuaka nane za aldukapanaldixa. ⁵Ne ma zúnake sakígaba zexaldíak jiaga, muldetua zhiksanekbalde za izhoshi na, jibañ tuabaldogatshak jiaga egaba abeti, Duwe Jesú zúnekuane shalda aldukagáñga nukakuek kakbeji, Jateja axazauwakue majaanauauxabé maxazauwaldí.

⁶Nas zúnake Jatek akeshiñga naki shuixaldikuéñ au niuwi naxakldañkaldá na gu. ⁷Guatshak naski Duwe Jesúja axazauwaldikue nezhgakuxanamak nagatsauxa jiba atshijiñgaba, kama ilshiji izhonuge. Akze, abá naldakí ek agapa neji, alduna ishiji izhoshiñga na, axatshaldikue nezhgakuxanamak saldikshá ni gukú. ⁸Ekí Nauwiji Sáñkaldá Duweja akldunamak, jian atshakuamak izhonuge shaldaki sáñkaldak izhalshuxa nageshi, matshuwi janshizhe naxatshaldixa au jananagaktú guane. Akze, aldéñki zúñgatsahauxabé zúnatuñka nak, zúnatuál naxaldixa ldiuwañ amak nageshi janshizhe naxatshaldixa. Atshakna, nas za ekí nagegazhaldixa, ne saldiñgaja “Duwe mokue axañga nak guakuéñ” ajañgui jiaktuatonaldixakue jiaga, ekíga kagexaldixa nzha.

Sakí axatshakue akbene

⁹Mañki nauwa axañga jai nas nugéñ nakbildaka niyakue ni majaanukú. ¹⁰Jinake ekí mikbeyakí. Demakí^s jai kagik zalda numakue za jañguapanguakna, nabashiñgueniki Tesaldónikaxa ne guane. Guatshak Duwek axazauwaldiamak Kaldesenteki Galdasía baxeni ne, Titukí^t Dalmasía baxeni ne. ¹¹Alduka^u za nagabane nagapa ni izhók. Akna maldagatshak, Malku^v Jatek axazauwatokugéñ nagaunegaka nak izhgapa maldakuldaxaldí. ¹²Guatshak Tíkikukí^w Epesuxa gaxanuge. ¹³Naxaldá makualdiake nají guañguakze, Kalpu tshuxa Taduáxa^x mashanuge,

^r 4.6 Plp 2.17. Jatek jika agaxegatshak suxake ji agaxegatuka auxaga naldaldiamake ni iyasukuxa. Ekibeñga Pábuldu Jate axazauwiñga asuxake akeshi shuixaldixa guaklde.

^s 4.10 Kls 4.14; Plm 24 ^t 4.10 2Kt 8.23; Ga 2.3; Tit 1.4 ^u 4.11 Kls 4.14; Plm 24

^v 4.11 Ajsh 12.12,25; 13.13; 15.37-39; Kls 4.10 ^w 4.12 Ajsh 20.4; Ep 6.21-22; Kls 4.7

^x 4.13 Ajsh 20.6

nagakuxa maldakuldaxaldí. Nají kaltakue jiaga nakuldagakue, akldé giemiki kuizhukga aksezhekldekue nakuldak makualdí.

¹⁴ Guatshak Aldejánduldu,^y shezhaxalda gauwi jibatshixaki, matshuwi sha nakuane. Ekí sha nakuane shaldaki Saldiñga netshi Sáñkaldaja agishkualdikshi guiyaba tuñshaldixa.^z ¹⁵ Akze, ejañki Duwe zunekwane gakuaká aguldijiñgaba, zũñgitamakualdiamak izhone nakna, ma jiaga be maxaldoxaldí.

¹⁶ Migatsaldi azhi migatsaldakí matuakuéñ kasak jai zalda sáñkaldakue naziyaaxauldatshak, ni me jiaga nazikualdagábaki, nahezua nabashá akuane. Naldatshak ekí nakuane Jateja kagatuakue jañguakí nzhakú. ¹⁷ Ekí nabajatshak nauwiji Sáñkaldá Duwe zúnake nas nañga izhogatshak, aldéñ shalda muldetua guaxaldikuamak kama nagé. Ekíki saldiñga juldíu saná naldagáldekue exa zhekuekueja aldukaldiamak. Atshak sha nakuí nakuaxaldixa ajañguane nalgué, Duweki nabi nakazhaldiamak nazikuaká janañga yo nakuá guane. ¹⁸ Akze, sakígaba sha nakuatshak jiaga, nauwiji Sáñkaldaki yo nakuí, numañ natuwiñga, jékaldaxa aldéñ sanegeñka nauldeyaldixa. Aldéñ zañga na akldé akzamakga akzukual za kizhogataná nzha. Ekíga shi naldí.

Aldiwe akbene

¹⁹ Akilda, asewá Paldiska^a nañga kajañguge makbeyaldí. Onésipuldu ajúk zaldakue juizhi ekíga makbeyaldí.^b

²⁰ Mikualdaldiamak Eldastuki kuíbuldu Kuldintuxa abane. Taldopimoki mulbatá akzeguakna Mildetuxaga abá ni guñgú.^c ²¹ Guatshak mañki níxalda bual zegagáñga maldaxaldiamak kama ilshiji makualdí. Ehúbuldu, Puldente, Aldinu, Kaldaudia saldiñga jai zalda Duwe ipananekueja jiaga majañguxa ni makuák.

²² Nauwiji Sáñkaldá Duweki mijí aldunaldi ma nañga shi izhoshí. Saldiñga netshi Jateki saldiñga minekuañ atemajañ éegaba guañ mimajañgualga shi noshí. Ekíga shi naldí.

^y 4.14 1Tm 1.20 ^z 4.14 Sal 62.12; Alm 2.6 ^a 4.19 Ai Paldiskaga na Paldásilda jiaga akuaka. ^b 4.19 Ajsh 18.2,18; 2Tm 1.16-17 ^c 4.20 Ajsh 19.22; 20.4; Alm 16.23